

आकाशवाणी

खबरां ----

1 प्रधानमंत्री नरेंद्र मोदी होरें वीर बाल दिवस दे मौके पर साहिबजादेन दी दलेरी ते बलिदान चेतै कीते।

2 राष्ट्रपति द्रौपदी मुर्मू होरें 17एं असाधारण बच्चें गी प्रधानमंत्री राष्ट्रीय बाल पुरस्कारें कन्नै सम्मानित कीता।

3 प्रधानमंत्री नरेंद्र मोदी कल दपैहरी मगरा वीडियो कांफ्रेंसिंग राहें 58 लख स्वामित्व सम्पत्ति कार्ड बागुजार करडन।

4 केंद्री उपभोक्ता संरक्षण प्राधिकरण नै संघ लोक सेवा आयोग दे इस्तेहानें च अपने नतीजें दे गलत दावे करने आहले कोचिंग इदारेन पर जुर्माना आयद कीता ऐ।

5 भारती जनता पार्टी नै कर्नाटक कांग्रेस पर सोशल मीडिया पर भारत दा विकृत नक्शा सांझा करने दा दोष लाया ऐ।

<><><><><><>

PM-Veer Bal Diwas

प्रधानमंत्री नरेन्द्र मोदी होरें आक्खेआ ऐ जे भारत दे लोकतंत्र दी व्यापकता गुरूएं दी शिक्षा, साहिबजादेन दे बलिदान ते देशै दी एकता दे मूल मंत्र पर

आधारित ऐ। अज्ज नमी दिल्ली च भारत मंडपम च वीर बाल दिवस समारोह गी संबोधित करदे होई प्रधानमंत्री होरें आक्खेआ जे गुरूएं दी परंपरा नै असें सब्बनें गी बरोबर दे मान सम्मान कन्ने दखिने दी सिखेआ दिती ऐ। ते देशै दा संविधान भी असें गी इस्सै विचार आस्तै प्रेरित करदा ऐ। प्रधानमंत्री होरें आक्खेआ जे वीर साहिबजादेें दा जीवन असें गी सखान्दा ऐ जे देशै दी अखंडता ते विचारधारा कन्नै कोई समझौता नेई कीता जाई सकदा। उने आक्खेआ जे संविधान लोकें गी देश दी संप्रभुता ते एकता गी सबनें थ्वा उप्पर रखने दे सिद्धांत दी सिखेआ दिन्दा ऐ।

प्रधानमंत्री होरें आक्खेआ जे साहिबजादा जोरावर सिंह ते साहिबजादा फतेह सिंह बडे गै लौहके हे पर उनदा साहस गासै थ्वा बी उच्चा हा। उने आक्खेआ जे वीर बाल दिवस असें गी सखान्दा ऐ जे हालात किन्ने बी मुश्कल कीहू नेई होन मुल्ख ते ओदे हित थ्वा बड्डा किश नेई होई सकदा। मोदी होरें आक्खेआ जे इतिहास च ते मौजूदा समें च बी युवा ऊर्जा नै भारत दी प्रगति च बड्डी भूमिका अदा कीत ऐ। बरे 2022 च प्रधानमंत्री मोदी होरें गुरू गोविंदसिंह हुन्दे साहिबजादेें गी श्रद्धांजलि देने आस्तै वीर बाल दिवस मनाने दी घोषणा कीती ही। इस अवसर पर प्रधानमंत्री होरें सुपोषित ग्राम पंचायत अभियान दी बी शुरुआत कीती। इस अभियान दा मकसद पोषण सरबन्धी सेवाएं गी मजबूती कन्नै लागू करना ऐ। लगभग साढे 3 हजार बच्चें ते प्रधानमंत्री राष्ट्रीय बाल पुरस्कार कन्नै सम्मानित बच्चें ते होरनें मन्ने परमन्ने दे लोकें इस कार्यक्रम च हिस्सा लैता।

<><><><><><>

Prez. Bal Puraskar

राष्ट्रपति द्रौपदी मुर्मु होरें अज्ज नमीं दिल्ली च 17 बच्चें गी उंदी असाधारण उपलब्धियें लेई 7एं श्रेणियें च प्रधानमंत्री राष्ट्री बाल पुरस्कार भेंट कीते। 14एं राज्यें ते केंद्रशासित प्रदेशें दे इनें बच्चें गी कला ते संस्कृति, बहादुरी, नवाचार, विज्ञान ते प्रौद्योगिकी, समाज सेवा, खेड्डें ते पर्यावरण दे खेत्तर च उंदी उपलब्धियें लेई एहू सम्मान भेंट कीते गो। इस मौके लोकें गी संबोधित करदे होई राष्ट्रपति द्रौपदी मुर्मु होरें वीर बाल दिवस दे मौके उप्पर साहिबजादे दी वीरता ते बलिदान गी श्रद्धांजलि दिती। उनें आखेआ जे एहू ध्याडा सिक्खें दे 10में गुरू श्री गुरू गोबिंद सिंह जी महाराज हुंदे पुत्तरें दे बेजोड़ बलिदान ते दलेरी दे प्रति सम्मान व्यक्त करने लेई हर बरे मनाया जंदा ऐ। पुरस्कार हासल करने आहले बच्चें गी बधाई दिंदे होई राष्ट्रपति होरें आखेआ जे उंदा कम्म असाधारण ते हरान करी देने आहला ऐ ते उंदी उपलब्धियां देशै दे सब्बनें नागरिकें गी प्रेरित करडन। राष्ट्रपति होरें आखेआ जे बच्चेंर दी प्रतिभा गी पन्थानना ते उनें गी मौके देना देशै दी रिवायत दा हिस्साब रेआ ऐ ते एहू रिवायत होर मजबूत होनी लोडचदी। राष्ट्रपति मुर्मु होरें आखेआ जे 2047 च जिसलै मुल्ख आजादी दा शताब्दीज समारोह मना र दा होग, उसले पुरस्कापर हासिल करने आहले एहू बच्चे देश दे जागरूक नागरिक होंडन। उने आखेआ जे ऐसे प्रतिभाशाली जागत ते कुडियां विकसित भारत दे निर्माता बनडन। प्रधानमंत्री नरेन्द्र मोदी होरें बी पुरस्कार हासिल करने आहले बच्चें कन्ने गल्लबात कीती।

<><><><><><>

PM-Svamitva

प्रधानमंत्री नरेंद्र मोदी होर कल वीडियो कांफ्रेंस राहें 58 लक्ख स्वामित्व प्रापटीं कार्ड बंडडन। भारतीय ग्रामीण सशक्तिकरण बक्खी मील दा पत्थर ते शासन दी जात्तरा इस कार्यक्रम च स्वामित्व प्रापटीं कार्ड 10 राज्यें छत्तीसगढ़, गुजरात, हिमाचल प्रदेश, मध्य प्रदेश, महाराष्ट्र, मिजोरम, ओडिशा, पंजाब, राजस्थान, उत्तर प्रदेश ते दऊं केंद्र शासित प्रदेश जम्मू-कश्मीर ते लद्दाख दे 50 ज्हार ग्रां शामिल ना। इस मौके प्रधानमंत्री होर संबोधित बी करंगन ते लाभार्थियों कन्नै गल्लबात बी करंगन। इस मौके पंचायती राज लेई केंद्री मंत्री राजीव रंजन सिंह, पंचायती राज लेई केंद्री राज्य मंत्री प्रो. एस.पी बघल ते होर मंत्री उत्थे मजूद होडन।

<><><><><><>

Chote Shabzada Martydrom-

छोटे साहिबजादे बाबा जोरावर सिंह जी ते बाबा फतेह सिंह जी हुंदे शहीदी दिवस दे सरबंध्यै च त्रै रोजा सालाना शहीदी सभा फतेहगढ़ साहिब पंजाब च शुरू होई। धार्मिक कार्यक्रम दी शुरूआत अखंड पाठ कन्नै होई। एह पाठ गुरुद्वारा ज्योति स्वरूप च शुरू होआ। गुरुद्वारा ज्योति स्वरूप इक थाहर ऐ जित्थे गुरु गोबिंद सिंह जी हुंदे दौनें साहिबजादे ते उंदी दादी माता गुजरी जी दा खीरी संस्कार कीता गेआ ह। मुख्य भरै थ्वां खरी मती गिनतरी च श्रद्धालु उत्थे मत्था टेकने लेई आवा'रदे ना।

<><><><><><>

PM-Veer Bal Diwas

प्रधानमंत्री नरेन्द्र मोदी होरें आक्खेआ ऐ जे भारत दे लोकतंत्र दी व्यापकता गुरूएं दी शिक्षा, साहिबजादेॆं दे बलिदान ते देशै दी एकता दे मूल मंत्र पर आधारित ऐ। अज्ज नमी दिल्ली च भारत मंडपम च वीर बाल दिवस समारोह गी संबोधित करदे होई प्रधानमंत्री होरें आक्खेआ जे गुरूएं दी परंपरा नै असें सब्बनें गी बरोबर दे मान सम्मान कन्ने दिखने दी सिखेआ दिती ऐ। ते देशै दा संविधान भी असें गी इसै विचार आस्तै प्रेरित करदा ऐ। प्रधानमंत्री होरें आक्खेआ जे वीर साहिबजादेॆं दा जीवन असें गी सखान्दा ऐ जे देशै दी अखंडता ते विचारधारा कन्ने कोई समझौता नैई कीता जाई सकदा। उने आक्खेआ जे संविधान लोकें गी देश दी संप्रभुता ते एकता गी सबनें थ्वा उप्पर रखने दे सिद्धांत दी सिखेआ दिन्दा ऐ।

प्रधानमंत्री होरें आक्खेआ जे साहिबजादा जोरावर सिंह ते साहिबजादा फतेह सिंह बडे गै लौहके हे पर उनदा साहस गासै थ्वा बी उच्चा हा। उने आक्खेआ जे वीर बाल दिवस असें गी सखान्दा ऐ जे हालात किन्ने बी मुश्कल कीहू नैई होन मुख्य ते ओदे हित थ्वा बड्डा किश नैई होई सकदा।

मोदी होरें आक्खेआ जे इतिहास च ते मौजूदा समें च बी युवा ऊर्जा नै भारत दी प्रगति च बड्डी भूमिका अदा कीत ऐ। बरे 2022 च प्रधानमंत्री मोदी होरें गुरू गोविंदसिंह हुन्दे साहिबजादेॆं गी श्रद्धांजलि देने आस्तै वीर बाल दिवस मनाने दी घोषणा कीती ही। इस अवसर पर प्रधानमंत्री होरें सुपोषित ग्राम पंचायत अभियान दी बी शुरुआत कीती। इस अभियान दा मकसद पोषण सरबन्धी सेवाएं

गी मजबूती कन्नै लागू करना ऐ। लगभग साढे 3 हजार बच्चें ते प्रधानमंत्री राष्ट्रीय बाल पुरस्कार कन्नै सम्मानित बच्चें ते होरनें मन्ने परमन्ने दे लोकें इस कार्यक्रम च हिस्सा लैता।

<><><><><><>

ECI-Report

चुनांऽ आयोग नै अज्ज आखेआ जे 2024 लोकसभा चुनाएं च 64 करोड़ 64 लख वोट पाए गे'न। इंदे चा महिला मतदाताएं दी गिनतरी 65 अशारिया 7-8 फीसद ऐ जेड़ी जे मर्दे दे मकाबले मती ऐ।

<><><><><><>

CCPA

केंद्री उपभोक्ता संरक्षण प्राधिकरण सी.सी.पी.ए नै संघ लोक सेवा आयोग स्तेहान 2022 ते 2023 दे नतीजे बारै च भ्रम आहले विज्ञापन देने आहले द'ऊं प्रतियोगी कोचिंग संस्थानें पर 7 लख रपे ते इक होर संस्थान पर 1 लख रपे दा जुर्माना लाया ऐ। सी.सी.पी.ए नै संस्थानें गी तुरत प्रभाव कन्नै भ्रम आहले विज्ञापन हटाने दा आदेश दित्ता ऐ। उपभोक्ता मामले दे मंत्रालय नै दस्सेआ जे एहू कार्रवाई उपभोक्ताएं दे हक्कें दी सुरक्षा लेई कीती गई ऐ जिस कन्नै एहू यकीनी कीता जाई सकै जे उपभोक्ता गी कुसै बी चीज या सेवा लेई कोई गलत या भ्रम आहले विज्ञापन नेई दित्ता जा।

<><><><><><>

AAP-Congress

दिल्ली च विधानसभा चुनाएं कौला पैहले आम आदमी पार्टी नै अज्ज कांग्रेस पर औंदे चुनाएं च बीजेपी गी जित्त दोआने दी कोश्ट करने दा आरोप लाया ऐ। पार्टी नेता संजय सिंह होरें नमीं दिल्ली च संवाददाताएं अगगे पार्टी दे प्रमुख अरविंद केजरीवाल हुंदे खलाफ कांग्रेस दे वरिष्ठ नेता अजय माकन दी किश टिप्पणियें पर ऐतराज जताया। उनें आरोप लाय जे श्री मानक होरें केजरीवाल होरेंगी देशद्रोही आखेआ जेड़ा जे ऐतराजजोग ऐ ते कांग्रेस पार्टी गी उंदे खलाफ 24 घैंटे दे अंदर कार्रवाई करनी लोड़चदी ऐ। श्री सिंह होरें आई.एन.डी.आई.ए गठबंधन पार्टी गी आखेआ जे माकन हुंदे खलाफ कोई कार्रवाई नेई कीती गई तां ओहू कांग्रेस गी गठबंधन थमां हटाई देंगन। दिल्ली दी मुख्मन्त्री आतिशी होरें बी इस मुद्दे गी लेइयै कांग्रेस पर हमला बोलेआ ऐ।

<><><><><><>

BJP-Congress

भारती जनता पार्टी नै अज्ज कांग्रेस दी कर्नाटका इकाई पर आरोप लाया ऐ जे उन्नै अपने सोशल मीडिया पर भारत दा खंडित नक्शा सांझा कीता ऐ जिस च अकसाई चीन ते पाकिस्तान दे कब्जे आहले कश्मीर गी शामिल नेई कीता गेआ। एहू नक्शा बेलगावी च आयोजित कांग्रेस दी कार्यसमिति दी बैठक शां सांझा कीता गेआ। नमीं दिल्ली च मीडिया कन्नै गल्ल करदे होई भारतीय जनता पार्टी दे प्रवक्ता सुशान्धु त्रिवेदी नै आरोप लाया जे कांग्रेस अतीत च बी एहू कम्म करदी ही।

<><><><><><>

Delhi-Pollution

राष्ट्रीय राजधानी दिल्ली च ब्हाऊ दी गुणवत्ता मती खराब श्रेणी च बनी दी ऐ। अज्ज दपैहरी 1 बजे औसत ब्हाऊ गुणवत्ता सूचकांक 342 दर्ज कीता गेआ। केंद्री प्रदूषण नियंत्रण बोर्ड दे मताबक शैहर दे किश इलाकें च सूचकांक 350 दा स्तर बी पार करी गेआ।



PM-MKB

प्रधानमंत्री नरेन्द्र मोदी अपने माहवार रेडियो कार्यक्रम “मन की बात” दे राएं औंदी 29 दिसम्बर गी देश-विदेश च रौहने आहले श्रोताएं कन्नै बचार सांझे करडन। हर म्हीने दे अखीरले ऐतवारें दिनै 11 बजे प्रसारत होने आले इस कार्यक्रम दी एहू 117मीं किश्त होग। कार्यक्रम च शामिल कराने लेई लोक अपने बचार टोल फ्री नंबर 1800-11-7800 पर फोन करियै जां फही नरेन्द्र मोदी ऐप पर बी इस म्हीने दी 27 तरीक तगर भेजी सकदे न। मन की बात दा प्रसारण आकाशवाणी ते दूरदर्शन दे समूलचे नेटवर्क पर कीता जाहगा। एह्दे इलावा एहू प्रसारण आकाशवाणी खबरें दी वैबसाइट ते न्यूज़ ऑन ए.आई.आर मोबाइल ऐप पर बी उपलब्ध होग। एह्दे कन्नो कन्नो आकाशवाणी समाचार, डी.डी न्यूज़, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी एह्दी लाइव स्ट्रीमिंग उपलब्ध होग। आकाशवाणी परा मन की बात दे प्रसारण दे तुरत मगरा मकामी भाशाएं च एह्दा अनुवाद बी प्रसारण कीता जाहगा।

<><><><><><>

IMD-Weather

मौसम विभाग नै अगले 2 दिनें च उत्तर पच्छिम ते मध्य भारत च गरज चमक ते कन्नै हल्की ते मझाटले दर्जे दी बरखा ते ऐन गड़ा पौने दी पेशगोई कीती ऐ। विभाग नै दस्सेआ जे पच्छमी खौदल करी इस म्हीने दी 27 ते 28 तरीक गी पंजाब, हरियाणा, चंडीगढ़, पच्छमी उत्तर प्रदेश, राजस्थान, विदर्भ, मध्य महाराष्ट्र, मराठवाड़ा, गुजरात ते मध्य प्रदेश च गरज कन्नै ऐनगड़ा बी पौने दी पेशगोई कीती ऐ। हिमाचल प्रदेश, पंजाब, हरियाणा, असम, मेघालय, ओडिशा ते राजस्थान च अगले 4 दिनें दौरान चिरे रातीं ते बडुलै मौके घना कोहरा छाए दे रोहने दी बी मेद ऐ।

<><><><><><>

VP-Jammu Visit

उपराष्ट्रपति जगदीप धनखड़ होर कल जम्मू-कश्मीर दे दौरे पर आवा र दे ना। उपराष्ट्रपति होर जम्मू च श्री माता वैष्णो देवी विश्वविद्यालय दे 10में दीक्षांत समारोह च मुख परोहने दे तौर पर शामिल होङन। श्री धनखड़ होर माता वैष्णो देवी मंदिर ते भैरों बाबा मंदिर बी जाङन।

<><><><><><>

SMVDSB-Yatri

श्री माता वैष्णो देवी अस्थापन बोर्ड नै इस बरै श्रद्धालुएं दी बड़ी बद्द गिनतरी दर्ज कीती ऐ। इसलै तगर 93 लक्ख शा मते यात्रुएं माता वैष्णो देवी जी दे दरबार मत्था टेकेआ। श्रद्धालु लगातार दौनें पारम्परिक ते वैकल्पिक रस्तेआं माता दे दरबार पुज्जा'रदे न। श्रद्धालुएं दी सौक्ख लेई अस्थापन बोर्ड नै कटड़ा रेलवे स्टेशन, बाणगंगा ते ताराकोट च विशेष लंगर लोआए देन।

<><><><><><>